

Scola da tgira sco center administrativ

La Regiun Surselva ha priu en mira la cumpra dil baghetg dalla Scola professiunala da tgira grischuna a Glion

DA HANS HUONDER / ANR

■ **Cun occasiun da sia seduta dils 17 da november 2010 a Glion sefatschenta il parlament dalla Regiun Surselva d'in credit da 40 000 francs per examinar la cumpra dil baghetg dalla Scola professiunala da tgira grischuna a Glion.** Il settember 2011 siara quella sias portas, aschia ch'il baghetg ch'ei en possess dalla claustra da s. Giusep ha naven da lu negin diever pli. La claustra pretend 2,8 milliuns francs pigl edifeci che sesanfla ella vischinonza dil spital regional.

En connex cun igl avegnir dalla scola da tgira ha la Regiun Surselva contactau gia baul la claustra s. Giusep concernent il baghetg e fatg empremas sondaziuns, schebein quel pudess vegnir nezegiaus futuramein per ses uffecis. La suprastanza ha incaricau il president *Sep Cathomas* ed il secretari *Duri Blumenthal* da far las retschercas correspundentas, denter auter era concernent il prezi da cumpra, ina finanziaziun pusseviva ed ina eventuala cooperaziun cun partenaris. Parallelmein ein ils menaders dils uffecis vegni incumbensai da sclarir lur basegns da plaz pils proxims onns. Concernent ils fatgs technics dil baghetg sa la suprastanza sebasar sin il rapport da schazetg da quest onn. Per part ei el vegnius renovaus ils davos decennis. Sco quei che la suprastanza constatescha en siu messadi per mauns dil parlament regional ei il baghetg en in stan mediocher entochen bien. Investiziuns ein denton indispensablas, oravontut per saver nezegiar las localitads per il diever d'in center administrativ. Il baghetg ha in volumen da rondund 14 000 meters cubic, la surfatscha totala dallas localitads importa struschamein 4000 meters quadrat. Per in diever futur vegnan rondund 3000 meters quadrat en damonda.

Basegns ei avon maun

Sco quei che la suprastanza scriva el messadi per mauns dil parlament regional ha la Regiun Surselva in basegns per ina surfatscha da localitads da rondund 930 meters quadrat. Cumpri lien ein



Il baghetg dalla Scola professiunala da tgira grischuna a Glion ella vischinonza dil spital regional savess survir egl avegnir sco center administrativ dalla Surselva, denter auter pil diever dils uffecis e dil secretariat dalla Regiun Surselva.

FOTO N. SIMMEN

tuts biros, stanzas da seduta, localitads per pausa e cuors, biblioteca ed archiv. Medemamein ensiara quella surfatscha ina gronda stanza da seduta, denter auter per las sessiuns dil parlament regional. La surfatscha calculada cumpeglia ils basegns dalla direzziun ed il secretariat dalla Regiun Surselva, il center da formaziun, la scola da musica, il survetsch logopedic, la promoziun da scolars talentai ed il post da coordinaziun per ils survetschs da sanadad. Il mument ein ils differents posts reparti sin pliras immobiglias. Per la centralisaziun da tut ils survetschs sut in tetg plaidan differents arguments. Denter auter eis ei pussevivel da nezegiar sinergias entras ina concentraziun dils uffecis. Entras ina cooperaziun pli stretga daventan ils plazs da lavur pli attractivs e la Regiun Surselva sa seposiziunar sco instituziun cun pensums regionalis. Plinavon vesa la suprastanza el rom dalla concentraziun era ina schanza unica per Glion. Encun-

ter ina concentraziun plaidan gest tenor basegns las investiziuns ch'ei da far e la centralisaziun sco tala. Igl access agl edifeci sur la via dil spital ei buc ideals. Ei seposcha denton la caschun da procurar per in tal directamein neu dalla via cantunala. In ulteriur aspect negativ pertucca ils cuosts da menaschi en cass che las investiziuns necessarias san buca vegnir fatgas.

Co vinavon?

Aschilunsch ch'il parlament regional conceda il credit da 40 000 francs per menar ulteriuras contractivas e per sclarir ils detagls dallas investiziuns e dalla finanziaziun duei vegnir schaffiu in concept general cun schazetg da cuosts e program da spazi en collaboraziun cun l'uniun da spital. Persuenter eis ei previu d'installar ina gruppa da lavur consistenta da representants dalla Regiun Surselva, respectivamein dall'Uniun da spital Surselva. Mede-

mamein duei vegnir fatg in contract da precumpra cun la claustra s. Giusep e fatg ulteriuras sondaziuns concernent la participaziun d'auters partenaris vid il baghetg ni sco affittaders futurs. Il zecladur 2011 duei il parlament allura decider definitivamein schebein la cumpra duei succeder. En cass d'in gie sespleiga lu la fasa dil referendum. Sche tut va optimal quenta la suprastanza dalla Regiun Surselva da saver exequir la renovaziun ed adattaziun dils baghetgs digl uost 2012 entochen il mars 2014, aschia che las localitads duessen saver vegnir retratgas igl avrel 2014. La claustra s. Giusep ei pronta da vender il baghetg per 2,8 milliuns francs. Il mument paga la Regiun Surselva rondund 120 000 francs tscheins annuals per las localitads affittadas per ils differents uffecis. Tenor messadi pudessen quels tscheins lubir da capitalisar ina summa denter 2,5 e 3 milliuns francs.

■ TUJETSCH

Gie al lag – na agl object da menaschi

(anr/hh) **Il cussegl da vischnaunca da Tujetsch ha sbursau la mesjamna sera ina summa totala da 150 000 francs per ils indrezs novs dalla piazza da campar Giu Milar a Rueras. La summa concedida sereparta sin 60 000 francs sco participaziun vid ils cuosts d'investiziun dalla infrastruttura, 15 000 francs sco participaziun vid il capital d'acziun e 75 000 francs sco contribuziun a fond perdu.** La decisiun en favur dalla piazza da campar ei stada unanima. Cun in baghetg per different diever – denter auter per ustria, terrassa, indrezs sanitars e magasin – duei la piazza da campar daventar pli attractiva. Persuenter vul la Campadi Rein SA impunder 534 000 francs. Tenor ils responsabels vegn ei ad esser grev da garantir la finanziaziun, malgrad il sustegn finanziel dalla vischnaunca. Differentas damondas per mieds finanziaus ein aunc pendentas.

Ina liunga discussiun ha il parlament, presidiaus da *René Epp*, menau tier la tractanda davart il project ed il credit per in niev lag natural ed in baghetg per different diever a Claus/Surrein. La fin finala ha il cussegl decidiu cun otg encunter treis vuschs da proponer alla radunonza da vischnaunca la realisaziun dil lag per ina summa da 750 000 francs. Perencunter ei el buca suandaus la proposta dalla suprastanza communal concernent il baghetg. Il credit correspundent da 350 000 francs

ha el buca concediu. In dils motivs ein ils cuosts da menaschi futurs stai sco era la concurrenza dall'entira infrastruttura per il Bogn Sedrun. Leu preveda la vischnaunca medemamein d'investar ils proxims onns. La suprastanza communal vegn probablamein a suttametter al pievel la varianta dil lag cun igl object da menaschi, respectivamein la varianta dil cussegl da vischnaunca cun ereger sulettemein il lag. Il pievel duei allura decider tgei varianta ch'el

preferescha. Unanimamein ha il parlament approbau en quei connex la midada dalla zona. Quella sto vegnir approbada all'urna. La proposta ord il miez dil cussegl da vischnaunca d'ereger il lag Giu Milar, pia el territori dalla piazza da campar, ei vegnida refusada.

Il lag previu a Claus/Surrein duei haver ina surfatscha da 3200 meters quadrat, il terren cunfinont per scher e sedivertir aunc ina ga ina tala da 2800 me-

ters quadrat. L'infrastructura el contuorn duei vegnir cumpletada aschia ch'il liug dispona dallas premissas per excursiuns e divertiment per hosps ed indigens. La realisaziun dil lag en quei liug ei pusseviva grazia alla deponia da material da scavamet digl AlpTransit.

Plinavon ha il cussegl da vischnaunca eligi in cumissin per la revisiun dalla lescha davart las contribuziuns d'avertura e las taxas da diever.



Aschia pudess il lag da far bogn sila actuala deponia dalla Neat a Claus sper Surrein veser ora.

■ MUSTÉR

Premi Desertina 2010 per il chor-baselgia

(cp) Dapi 2004 renconuscha la vischnaunca da Mustér prestaziuns specialas d'instituziuns sco era da vischins e vischinas sin il sectur dalla cultura e dil sport. Dacuort ha la suprastanza communal – en concordanza cun la cummissiun – decidiu da surdar uonn il premi da renconuschientscha al Chor-baselgia Sogn Gions Mustér. Quel embellescha onn per onn numerus survetschs divins e fiastas ecclesiasticas.

Il premi da promoziun va all'Uniun da scursalar e spassegiar Mumpé Medel che festivescha uonn il giubileum da 10 onns. En quei interval ha la gruppa fatg gronds sforzs e bia lavur cumina per poscher in'attractiva caschun da scursalar e viandar per indigens e hosps.

Il premi da renconuschientscha ei dotaus cun 3000 francs, quel da promoziun cun 2000 francs. La surdada dil premi ha liug a moda festiva a caschun d'ina seduta speciala dil cussegl da vischnaunca venderdis, ils 10 da december 2010 en halla Cons.

■ CASTRISCH

Matinada da benefeci en baselgia

(mc) A l'ocasiun dil gi dalla reformaziun ha liug dumengia proxima, ils 31 d'october ina matinada da benefeci ella baselgia reformada da Castrisch. La matinada entscheiva allas 10.45 cun in cuort priedi per il Di dalla reformaziun. Allas 11.15 suonda la matinada da benefeci cun ovras da Johann Sebastian Bach culs interprets *Franziska Staehlin* sco soprannista ed organista e ser *Jan Andrea Bernhard* alla flauta. *Franziska Staehlin* ei organista a Castrisch e scolasta da cant al Conservatori a Turitg. Ser *Andrea Bernhard* ei plevon a Castrisch ed ha doctorau davart las relaziuns pastorals denter il Grischun e Transilvania ed enconuscha bein quella regiun ord siu temps da studi e sco docent. Instrucziun musicala silla flauta ha ser *Bernhard* giu tier *Istvan-Zsolt Nagy* a Turitg.

Interpretadas vegnan las ovras «Preludi e fuga en d-Dur» per orgla BWV 850, l'aria per sopran, flauta ed orgla «Ich folge dir gleichfalls mit freudigen Schritten» BWV 245, la paritada a-moll per flauta BWV 1013 e la sonata en g-moll per orgla e flauta BWV 1020. Suenter el concert vegn surviu in aperto. La collecta va cumpleinamein en favur dalla renovaziun dalla orgla a Kanyad (Ulies en Rumenia). La pleiv da 400 olmas dispona buca dils daners necessaris per la renovaziun da sia custeivla orgla.

■ FLEM

Dieta dalla Societad svizra dil dretg penal

(anr/hh) Per la secunda ga suenter 2006 salva la Societad svizra dil dretg penal da present sia dieta d'instrucziun el hotel Casa d'uaul a Flem. El center da quella stattan ils differents aspects dil mussament. A quei arranschament che cuoza dus dis e ch'ei sut la direzziun dalla derschadra superiura da Berna, *Annamarie Hubschmid*, refereschan derschaders, procuraturs publics, miedis e scienziats dil dretg. 270 persunas occupadas sil sectur dil dretg penal en differents cantuns separticipeschan alla dieta.

reclama

DERUNGS AG
electro
920 00 00